


Fulan Maiu 2013

SDB no FMA

HAFUTAR AN HO KÓR KSOLOK NIAN

Oratóriu iha Timor: Uma fiar nian




Peçamos à Virgem Maria que nos ensine a viver a nossa fé nas ações de cada dia, e a dar mais espaço para o Senhor.

Papa Francisco, 1.º de maio de 2013

FULAN MAIU

Dom Bosco hanorin no hatudu ho ninia moris, domin boot tebes ba Na'in Feto; madre Mazzarello mós hadomi Maria nu'udar oan feto ida. Kreda tomak, husik tempu Antigu nian, dedika fulan maiu ba Na'in Feto, tan ne'e, durante Tinan Fiar nian, kapas tebes atu hateke ba Maria nu'udar feto ida ne'ebé halo dalan atu hake'an no hametin ninia fiar.



JOGU

Hamutuk ho Maria

Jogu ida ne'e sei fahe ba parte 4, fatin ida-idak representa fatin sira iha ne'ebé Na'in Feto hela ba.

Preparaun: fahe oratorianu sira ba grupu ho membru na'in 10 ka 15. Hafoin prepara **materiál** ne'ebé sei tuir ba grupu ida-idak: liras anju nian, buli, balde ho bee.

Ba momentu ida-idak (Nazaret, Belem, Ejiptu, Jerusalem) prepara envelope ida ho indikasaun ne'ebé tuir mai, no animadór ida ba fatin ida-idak, sei kontrola katak grupu sira hala'o duni buat ne'ebé husu. Grupu sei hili envelope ida, no bainhira halo ona buat ne'ebé husu, sei simu envelope seluk ho letra ida husi naran MARIA.

ATIVIDADE síra

Tersu

Bele prepara tersu moris nian atu hatudu iha parokia ka eskola ka oratóriu, hodi tulun ema atu hadomi liután Maria.

Knananuk ba prezensa tinan 25 FMA sira nian

Imi-nia oratóriu ka grupu hatama ona knananuk ida ba FMA sira prezensa iha Timor durante tinan 25? Se seidauk, imi sei iha tempu!! Maria mós iha parte importante liu iha irmán sira nia istória iha Timor, nune'e... keta baruk! Ami hein imi-nia knananuk

3

Fraze furak

Iha Valdocco Dom Bosco hakerek iha surat-tahan boot fraze ruma ne'ebé tulun foin -sa'e sira atu hanoin ba sira-nia moris no hametin sira-nia fiar. Nia tau fraze sira ne'e iha koridór no iha veranda sira nune'e, bainhira labarik sira liu, bele lee no hanoin ba sira-nia hahalok. Imi bele prepara fraze ruma kona-ba Maria, hakerek iha surat-tahan boot no tau iha fatin ruma ne'ebé labarik no foin-sa'e sira bele haree (atu tama ba kapela/Kreda? Iha ai-hun sira ne'ebé haleu kampu?... oratorianu sira bele uza sira-nia fantasia).

Ave Maria

Dom Bosco hanorin ba ninia oratorianu sira, atu reza Ave Maria 3 bainhira liu husi Santuariu ida ka uma Kreda. Bele hanorin fali tradisaun salesiana ida ne'e hodi husu ba labarik sira atu reza ba intensaun sira ne'e:

- Ave Maria ida ba sira-nia moris rasik
- Ave Maria ida ba ema ida ne'ebé sira hadomi
- Ave Maria ida ba intensaun hotu ne'ebé ita-nia Inan iha Lalehan simu loron-loron

4



EJIPTU: Maria no José hakarak halai atu bele salva Jezús husi Herodes nia liman, tan ne'e sira prepara sasán ne'ebé sira presiza. Tau hamutuk: sepatu par 2, kalsa no saia ida, faru 2, botil 1 bee nian no lipa 1. Se laiha buat hirak ne'e, sira sei buka buat ruma ne'ebé bele uza duke buat ne'ebé falta.

JERUSALEM: buat ne'ebé importante liu iha Jerusalem ba hebreu sira mak Templu; S. Pedro dehan katak "ita mak fatuk moris nian". Nu'udar grupo imi koko atu halo "uma" ida hodi hamriik, ka hodi hako'ak malu... la bele uza kadeira ka sasán atu halo odamatan no janela.

NAZARET: Anju Gabriel lori maromak nia lia-menon ba Maria. Imi fahe grupu ba 2 (A no B) no grupu ida hamriik dook husi grupu seluk. Hahú ema ida husi grupu A nian, ne'ebé hatais liras no halai to'o grupu B hodi fó ninia liras ba grupu B nia membru ida. Ema ida ne'e sei halai fali ba grupu A hodi entrega liras ba ema ida fali... kontinua halai hanesan ne'e to'o bainhira ema hotu halai ona.

BELEM: grupu apresenta presepiu moris nian. Membru hotu tenke envolve hodi hili personajen ida. Hotu-hotu tenke foti sira fatin hodi la book an, hanesan statua sira. Animadór sei kontrola katak ida-idak.

AIN KARIM: Maria ba tulun nia prima Isabel, tan ne'e, feto sira sei enxe buli ho bee no mane sira sei tutur buli to'o fatin ne'eb'e marka ona.

Bainhira grupu ida simu ona letra hotu no bele forma naran Maria, sira sei deside oinsá sira bele hamriik hodi kaer surat-tahan (hanesan bainhira ita hakarak hasae foto). Animadór sira sei hili grupu ne'ebé forma ho jetu!



ISTÓRIA

Ohin lora iha inan ruma ne'ebé kontinua tuir Maria nia ain-fatin iha sira-nia hahalok

Senhora Gemma Capra Calabresi iha tinan 25 bainhira terorista sira oho nia laen, komisariu Polisia nian; nia iha oan na'in 2 no ida ne'ebé seidaok moris. Depois de tinan ruma, nia rasik fó sasin kona-ba momentu ida ne'ebá.

"Iha momentu ida ne'ebá, ha'u sente katak ema ruma tulun ha'u, ha'u la enfrenta mesak situasaun ne'e. Ha'u sente katak ha'u simu prezente fiar nian iha momentu ida ne'ebá! Bainhira ha'u hamriik hodi

hateke ba ha'u-nia laen nia isin mate, ha'u nia Amo Paroku hamriik besik ha'u no kaer ha'u-nia liman. Ha'u dehan ba nia: 'Ita reza Ave Maria ida ba ida ne'ebé tiru nia família.' Ha'u la hatene oinsá liafuan sira ne'e mosu iha ha'u-nia ibun, ha'u sente katak Maromak liu husi ha'u-nia moris no halo ha'u husu Ninia inan nia tulun. Ha'u hakotu ona katak ha'u-nia oan sira sei moris iha domin, hodi hakribiit odi no vingansa; ha'u seidaok moris tuir to'o rohan buat ne'ebé ha'u dehan iha momentu ida ne'ebá. Dala ruma ha'u reza ba sira ne'ebé tiru ba ha'u-nia laen, maibé ha'u seidaok biban atu lori sira iha ha'u-nia laran bainhira ha'u simu Komuñau. Ha'u hakarak halo no ha'u hein katak Na'in Feto sei tulun ha'u."



DOM BOSCO nia esperiênsia

Husi Domingos Savio nia moris

Dom Bosco rasik haktuir: "Besik ona Festa Maria Na'in Feto sala laek nian, diretór fó aten-barani ba foin-sa'e sira iha uma laran, atu sira prepara an atu selebra didi'ak Maromak nia Inan, maibé liuliu nia fó hanoin ba sira atu husu grasa hotu ne'ebé sira presiza ba sira-nia Inan Lalehan nian. Tinan ida ne'ebá, 1854, iha Roma teologo sira reflète kona-ba dogma kona-ba Maria ne'ebé moris sala laek. Iha oratóriu mós, ida-idak haka'as an atu selebra solenidade ida ne'ebá ho di'ak no hodi fó fuan espirituál ba foin-sa'e sira.

Domingo Savio mak ida ne'ebé laran manas atu selebra festa ida ne'e ho atitude santu nian. Nia rasik hakerek floriña 9, katak hahalok 9 virtude nian ne'ebé tenke hala'o lora ida virtude ida. Nia prepara an no halo nia konfisaun jerál ho ksolok no nia simu Sakramentu sira ho devosaun boot.

Iha dia 8 desembru kalan, hotu tiha selebrasaun iha uma Kreda, Domingos tuir nia Konfesór nia konsellu no ba altár Na'in Feto nian no nia hafoun promesa sira ne'ebé nia hakotu iha lora Primeira Komuñau nian,, hafoin nia repete ba dala barak: "Maria, ha'u fó ha'u-nia fuan ba ita; tulun atu fuan ne'e bele ita-nian ba nafatin. Jezús no Maria, ita boot sira mak ha'u-nia belun ba nafatin! Maibé, favór ida, halo ha'u mate duke mosu mai ha'u desastre atu halo sala."

Hodi foti Maria nu'udar tulun atu hametin ninia devosaun, Domingos nia hahalok morál fó ezemplu di'ak ba kolega sira no hamutuk ho virtude sira seluk, dada ha'u-nia atensaun husi uluk kedas, no ha'u la bele haluha ona.






IMAJEN

Bainbain kuadru sira Na'in Feto nian hatudu Maria ne'ebé hamnasa midar, maibé susar atu hetan kuadru ida ho Maria ne'ebé hamnasa. Iha ne'e bele haree oinsá Maria hatudu nia ksolok bainhira nia hasoru Isabel no deskobre katak nia mak isin rua. Grupu ruma "pro-life" hili kuadru ida ne'e nu'udar sira-nia modelu tanba Maria hatudu ksolok ba moris foun ne'ebé iha Isabel nia knotak.

Bele apresente kuadru ida ne'e ba labarik sira hodi la esplika ba sira saida mak hatudu, maibé husu ba sira atu rekoñese momentu ida ne'e bainhira mosu iha Maria.

- Kuadru ida ne'e reprezenta se?
- Maria halo saida?
- Tansa nia hamnasa?
- Oinsá ita bele moris tuir Maria nia atitudeida ne'e?



ORASAUN

Iha remata fulan maiu nian ita selebra festa Visitasaun nian. Tan ne'e iha ne'e bele hetan selebrasaun badak ida ba loron ida ne'ebá.

(hahú hodi fô ba oratorianu ida-idak surat-tahan ki'ik-oan ida)

Kantu: Totus tuus

G: Maria mak modelu santidade nian. Se ita hateke ba nia ita hetan matadalan ida, no inan ida ne'ebé tulun ita atu komprende Maromak nia domin. Maria hatudu mai ita katak Maromak kontinua atu tau matan ba ita no prontu atu fô Ninia tulun. Iha Maria Maromak nia domin halo An ba ema, Jezús. Ho konfiansa ita hateke ba Maria ne'ebé dehan: "Halo tuir Ita-nia hakarak".

L: Lk 1,39-45

G: hanesan Maria ba vizita nia prima atu tulun nia, oratorianu ida-idak hakerek ninia empenú serbisu nian ba semana ne'ebé sei mai no sei lori iha Na'in feto nia statua (ka kuadru) nia oin. (durante tempu ida ne'e bele hananu ka reza Ave Maria 10)

G: Ita agradece Na'i ba buat hotu ne'ebé ita simu

I: Ami agradece Ita, Na'i, ba prezente fiar nian, ne'ebé Ita haraik mai ita iha loron Baptizmu nian no nabilan iha Na'in Feto ne'ebé fiar ba Ita Liafuan hodi dehan "Ha'u mak ne'e".

2: Ami agradece Ita, Na'i ba prezente esperansa nian, ne'ebé suporta ami-nia dalan moris nian, no tulun ami atu haree no hadomi buat ne'ebé seidak iha no nabilan iha Maria, feto ne'ebé hein iha Kruz hun no hamutuk ho apostólu sira iha senakulu.

3: Ami agradece Ita, Na'i, ba prezente domin nian ne'ebé hela ba nafatin no halo ami hasoru Ita iha ema ida-idak, haraik mai ami domin ne'ebé halo Maria prontu nafatin atu ba hasoru sira ne'ebé hakarak hatene Ita.

4: Ami agradece Ita, Na'i ba Maria, Ita-nia inan no ami-nian, ne'ebé hatudu virtude hotu-hotu, feto forte no ezemplu justisa nian; ami hahí Ita ne'ebé moris no ukun ba nafatin.

G: Ita kaer liman hodi hamulak ba ita-nia Aman orasaun ne'ebé Jezús rasik hanorin mai ita: AMI AMAN

H: (reza hamutuk)

O Maria, ki'ik sira nia inan, ita hatudu konfiansa ba labarik no foin-sa'e sira no haruka sira atu haklaken Jezús ba kolega sira. Simu sira-nia ksolok, sira-nia terus, sira-nia mehi no esperansa sira. Loke sira-nia fuan ba damen no amizade. Akompañia sira ne'ebé ki'ik ka presiza liu ho ita-nia domin inan nian. Tau matan ba família sira no haraik ba sira unidade no damen. Lori ami hotu tuir dalan esperansa no ksolok nian ne'ebé Jezús hatudu ho ninia Evanjellu.